

TUSI TAIALA

**MO LE PULEA TATAU MA LE VA'AIA LELEI O
I'A MA FIGOTA O LE GATAIFALE**

O LE AFIOAGA O



Pule mamalu a Alii ma Faipule ma tagatanuu o le Afioaga o SATALO ma le Lagolagosua a le Vaega
o Faigafaiva.

Matagaluega o Faatoaga ma Faigafaiva

FAASOLOGA

1	UPU TOMUA.....	1
1.1	Autu o le Taiala	1
2	TULAFONO AUTU O FAIGAFAlVA	2
2.1	Tulafono Faatonutonu o Faigafaiva (mo le Laiti o l'a ma Figota)	2
2.2	Tulafono Laiti a Afioaga	2
3	FAAMATALAGA E UIGA I LE AFIOAGA	2
3.1	Gataifale o SATALO.....	3
4	FAIGAFAlVA I LE AFIOAGA ma FAAFITAUlI	4
4.1	Ituaiga Faigafaiva ma l'a Maua	4
4.2	Aotelega o Tulafono Faale-nuu tau Faigafaiva i Aso ua Mavae.....	5
5	O LENEI FUAFUAGA TATAU/TAIALA.....	5
5.1	Tapenaga.....	5
6	FUAFUAGA FAATAATITIA ma TULAFONO.....	7
6.1	la Faamalosia Tulafono Faale-nuu e Faasaina ai Faigafaiva le Talafeagai	7
6.2	la Faasalalauina Tulafono a le Afioaga	8
6.3	Faasaina Upega ma Tili Matanini'i.....	9
6.4	Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami	9
6.5	la Aoina ma Faatama'ia Alamea	10
6.6	la Faasaina tu'iga ma faamo'a	11
6.7	la Faasaina le Fagotaina o l'a ma Figota Laiti	12
6.8	Faasao o le Gataifale o SATALO	12
6.9	la taofia ma faasaina le eliina ma laueseina o oneone mai le gataifale.....	13
6.10	Faigafaiva e faaaogaina ai Faguea ma mea manava	14
6.11	Faasaina faigafaiva mai isi Afioaga.....	15
7	ILOILOGA O LE TAIALA.....	15
8	UPU MULIMULI	15
10	SUI AUAI I FONOTAGA SA TAPENAINA LENEI FUAFUAGA TATAU	16
11.	KOMITI O LE FAASAO O LE GATAIFALE A LE AFIOAGA	17

Fa'alupega o le Afioaga

**AFIO ALO O FANENE MA LE USOALI'I
ALALATAI TALOOLEMA'AGAO
MA LE AIGA SATALO
SALELE'A MA LE LAUTI NA LAULELEI**

1 UPU TOMUA

O faigafaiva i gataifale o Samoa e taua tele mo le fofoga taumafa aemaise lava i afioaga i tua. I le tele o afioaga, latou te le o faatauina le pulea tatau ma le vaaia lelei o punaoa ma le siosiomaga o le gataifale. O le faia ma le faaogaina o ituaiga faigafaiva faa-onapo-nei e i ai mea manava, upega ma tili mataninii e faamata faigofie ai ma tele ai i'a maua ae o loo faaitiitia ai le tamaoaiga o le gataifale. O nisi o atinae ma galuega faatino ua faaleagaina ma faatamaia ai le tele o nofoaga ma meaola o le sami e pei o:-

- le tanumia o vaega o le gataifale, togotogo ma le talafatai mo eleele-fou (fanua);
- faigafaiva le talafeagai pei o fanaia, ava niukini, vailaau oona ma faamo'a/tuiga.
- soona taina i lalo o laau i autafa o vaitafe ma vaomatua

O nei faafitauli o loo tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faanatura e pei o galu malolosi faapea matagi ma afā ua tuanai e pei o Ofa 1990, Val 1991 ma Heta 2004.

O i'a ma figota o le sami sa faamoemoe iai le fofoga taumafa o tagata Samoa, ae ona o faafitauli pei ona taua ua faatamaia ma faaitiitia ai nei punaoa o le sami ua tele ina taugata ai, faapea le faamoemoe o tagata Samoa i meaai tuu aisa ma meaai tuuapa o lo o faatauina mai atunuu i fafo. O se atugaluga lea o lo o iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame o le faasaoina ma pulea tatauina o le gataifale o Samoa na amata mai e le Ofisa o Faigafaiva i le tausaga 1995 i le faatupega mai le Malo Ausetalia (AusAid) mo le lima tausaga. E faataua ai le fesootaiga ma le galulue soosoo tauau ma afioaga aua le faatuina o latou ogasami faasao. O taualumaga o le polokalame e aofia ai le soalaupuleina ma le fausiaina o se Tusi Taiala e tamauina ai fuafuaga faataatitia a le afioaga faapea le Ofisa o Faigafaiva.

O se tasi o autu taua o lenei polokalame o le toe tapu'e mai lea o tamaoaiga ma faaoga tatau punaoa o le gataifale ma le sami ina ia maua pea aua tupulaga lalovaoa o Samoa. O le puleaina ma le lelei o lenei polokalame faasao i nuu, e i lima ma aao o afioaga lava o lo o faaogaina nei punaoa ma tamaoaiga.

O fuafuaga faataatitia i lenei Tusi Taiala e unaia ai le vaaia lelei aemaise le pulea ma le fuafua tatau o le faaogaina o le tamaoaiga o le gataifale ma le siosiomaga o SATALO.

1.1 Autu o le Taiala

O le autu lenei sa faatalatalanoaina ma malilie autasi i ai vaega uma o le afioaga o SATALO:

- la vaaia lelei ma pulea tatau le siosiomaga o le gataifale ;
- Toe faatupulaia punaoa ma tamaoaiga o le gataifale mo tupulaga i le lumanai.
- Siitia le silafia o le afioaga i auala e puipuia lelei ai punaoa o le sami

2 TULAFONO AUTU O FAIGAFAlVA

O le Tulafono Autu o Faigafalva, 1988 ua avea ma taiala mo pui puiga, galuega ma isi vaega tau faigafalva ma le sami e pei:-

- o le faasaina, puleaina ma le atina'eina;
- faasaina o le faia o faigafalva le talafeagai;
- faamalosia le laiseneina o vaa fagota mo fagotaga faapea le
- vaaia o taiala ma maliega aua le pulea tatau o faigafalva i le va ma atunuu i fafo.

O nei tulafono uma e le o lava le silafia e le toatele o tagatanuu o Samoa aemaise le faamalosia e afioaga. Ona o nei faafitauli ua taumafai ai le Polokalame Faasao o le Gataifale mo Afioaga e unaia nisi o vaega o loo faatinoina nei e pei o aoaoga faapea le fesoasoani tele i le faamalamalamaina mo le silafia e le mamalu o le atunuu o ia tulaga.

2.1 Tulafono Faatonutonu o Faigafalva (mo le Laiti o l'a ma Figota)

O le Tulafono Faatonutonu o Faigafalva 1995, e faatapulaaina ai le laiti o l'a ma Figota e fagotaina ma faapea ona faatauina ai nisi o vaega e pei o:-

- aiāiga mo le pui puiga ma le faasaina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina;
- pole mo fagotaga (faigafalva i tuaau);
- fua faatapulaa o l'a ma figota e faatagaina ma isi.


2.2 Tulafono Laiti a Afioaga

O Tulafono Laiti a nuu ma afioaga ua amanaia tele e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona latou molia i le tulafono soo se tagata e le usitaia tulafono ua aiāia i totonu o le Tusi Taiala a lea afioaga. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupule ma autasi iai le pule mamalu a alii ma faipule o afioaga lava.

3 FAAMATALAGA E UIGA I LE AFIOAGA

O le afioaga o SATALO e i le itu i Saute o le motu o Upolu (silasila i le faafanua) i le itumalo o Falealili. E tusa ma le 45-50 minute e faimalaga mai ai i le taulaga i Apia i se taavale afi. O se afioaga e matagofie ona laufanua, mamā foi lona siosiomaga ma lona talafatai aua e teuteu ma faamamā e taulele'a faapea le komiti a Tina. O uluai aso Gafua uma o masina taitasi e tauaofia ai le Fono a alii ma faipule mo le soalaupuleina o atina'e eseese ma fuafuaga faatino aua le soifua manuia lautele o tagatanuu o le afioaga.

Ata 1: Faafanua o Upolu o lo o faailoa mai ai le afoaga o SATALO



Vaega Faufautua (Ofisa Faigafaiva, 2009)

O le faitau aofai o tagata o le afoaga o SATALO e i le va o le 300 i le 350 (Ofisa o Tusigaigoa, 2001) e le o aofia ai i latou ua faimalaga atu ma aumau i Niusila, Ausetalia, Amerika ma isi atunuu i fafo. I totonu o le afoaga, o le toatele o tagata e nonofo latalata i le sami. O le Aoga Faataitai (Pre-school) ma le Aoga Tulagalua (Primary School) o loo aoa’oina ai alo ma fanau laiti i totonu o le afoaga. O le vaega matutua o loo a’otauina i le Aoga Maualuga a le Itumalo Falealili faapea Kolisi maualuga eseese i totonu o le atunuu. E lua ni malumalu e pei o le Ekalesia Metotisi ma le Ekalesia Faapotopotoga Kerisiano i Samoa o loo tapua’i ai le afoaga. O nei tapuaiga o loo unaia ai le ola faa-kerisiano o tagata lotu i totonu o SATALO, o se itu taua tele mo le nonofo fealofani o tupulaga aemaise le galulue faatasi o le afoaga i atina’e eseese.

O SATALO e mamalu ana pulega aua e puleaina lava e le Fono a Alii ma Faipule o le afoaga. O le aumaga (Aualuma a Meleiseā) e lava saunia i taimi uma aua le tautuaina o matai faapea tina latou te avatua fautuaga lelei mo ni mataupu tau lotoifale o le afoaga.

3.1 Gataifale o SATALO

O le afoaga o SATALO e tu matafaga ma e gatasi maualalo ona laufanua. O lenei afoaga e iai lona a’au pe a ma le 400 mita le umi. O le mamao o le a’au mai le matafaga pe tusa ma le 250 mita. O le vaega e aupito sili ona loloto o le aloalo pe a pe eleele le tai i le taimi nei e tusa ma le 10-15 futu. E mau ma tamaoaiga tele gataifale o le afoaga i punaoa eseese e iai ume, palagi, laea, filoa, fe’e ma figota e pei o tuitui ma vaga. O le mafuaaga tonu lea e matuā toatele ai le au-faifaiva mai isi afoaga tuaoi e fagogota i le aloalo ma le aau o SATALO. I le taimi nei e le’o iai se tulafono a le afoaga e faasaina pe taofia ai nei tagata fagogota.



4 FAIGAFAlVA I LE AfIOAGA ma FAAfITAUl

I le faatinoga o faigafaiva i le afioaga, o alii e faatinoina fagotaga mauu i le aloalo aemaise tua'au, pe a ma le 10 -15 faifaiva e fagotaga pe ta'i faatasi i le faatolu i le vaiaso. I fagotaga i tuaau a alii, e tele ina faaogaina ai paopao. I fagotaga a le itupa o tamaitai, pe a ma le 10-15 i latou e fagotaina figota e pei o faisua, tuitui, vaga ma loli ma isi taumafa o le sami.

4.1 Ituaiga Faigafaiva ma l'a Maua

O nisi nei o ituaiga faigafaiva eseese o lo o faatinoina mo le fofoga taumafa o aiga, faalavelave i totonu o le afioaga ia po o le faatau foi mo tupe maua. O ia fagotaga e iai le:-

- Mauu ma le matatao/mata;
- Afaloloa;
- Upega ma tili;
- Lama moli uila;
- Tuiga sea, loli, fugafuga mama'o ma ape faapea aoina o aliao ma faisua i luga o le a'au o lo o faatinoina e tina, tamaitai ma le fanau.

O le tele o i'a sa maua i aso ua mavae ua faigata ona maua i aso nei, ae a maua foi ua faaitiitia le faitau aofai faapea le lapopoa. O i'a ta'atele i le aloalo e iai:-

- Lo/pa'u'ulu;
- Mataelele/filoa;
- Ili'ilia, Ume;
- Gatala
- Fugausi ma laea
- Fe'e ma pusi.

O le mau a le tofi pulenuu le fetalaiga Talooema'agao Olano, sa maua lava laui'a i le papa sosolo o loo i uta pe a ma le 15 mita mai le matafaga i tausaga ua mavae; peitai o lenei vaitau ua le o toe vaaia. Sa faamautuina lenei mau i taimi o fatalatalanoaga ma le vaega o matai o le afioaga. E iai foi figota o le gataifale ua vaaia le faaitiitia o le faitau aofai aemaise o le tele o ni itula e faaluina mo fagotaga pe'a faatusatusa i le tele o tausaga ua mavae. O nisi o figota ua faaitiitia ma ua faigata ona maua e iai:

- faisua, aliao ma alili.

O faafitauli ma suiga ua iai nei gataifale o SATALO e pei ona ta'ua, o le āia o le gataifale i galu malolosi ma afā faapea le faaitiitia o i'a maua ma figota sa tele i aso ua mavae. O nisi o mafuaagaa o le soona fagotaina ma le faaogaina o faigafaiva le talafeagai e pei o fanai'a, ava niukini, tu'iga ma isi. O le popolega o le afioaga ona o le faatupulaia pea o nei faafitauli; ae o le gataifale o lo o faamoemoe iai le fofoga taumafa ma isi manaoga tatau i aso uma aemaise le lumanai. O lea ua a'e ai se tofa i alii ma faipule ina ia pulea tatau ma vaaia lelei punaoa ma alamanuia ma le siosiomaga o le gataifale o SATALO.

4.2 Aotelega o Tulafono Faale-nuu tau Faigafaiva i Aso ua Mavae

O SATALO, e i ai ana tulafono i aso ua mavae ma o lo o faaauauina pea ma mamalu i le pulega a alii ma faipule. O ia tulafono e matua faasaina lava faigafaiva le talafeagai e pei o:

- Fanaia;
- Ava niukini;
- Vailaau oona;
- Faamo'a/Tu'iga;
- Faaogaina faatasi o tane mauulu ma moliuila i lama (scuba gears) pei ona matua faasaina i tulafono o faigafaiva.

E ui lava ina ua i ai tulafono e pei ona taua, ae le o atoatoa lona faatinoina ma lona va'aia ona o le lē aloaia e le 'au faifaiva mai isi afioaga. E le o lelei fo'i ma atoatoa ona faamamaluina e le afioaga nei tulafono. E le'i faasalalauina foi nei tulafono mo le silafia lautele e tagata fagogota. O le auai o SATALO i le polokame lenei o le a galulue soosoo tauau ai ma le Vaega o Faigafaiva ina ia faamalosi ma puipua malu ai punaoa o le gataifale faapea tulafono ua taua i luga.

5 O LENEI FUAFUAGA TATAU/TAIALA

E taua le fuafua lelei ma tulimata'i le sini autu o taumafai le mamalu o le afioaga e faataunuaina. O le faamoemoe mauuluga o le Malo, ina ia faaleleia le soifua manuia o tagata o le afioaga ma ia faatupulaia atili mea taumafa mai le sami. O lea e manaomia ai le pulupululima o tagata uma o le afioaga i soo se faatinoga lelei e le gata e tua iai ae maua ai lo latou tamaoaiga. E pei ona ta'ua i le amataga, o le AUTU na talanoaina ma autasi uma iai finagalo o vaega taitasi o le afioaga i taimi o faatalatalanoaga:

- ✚ la pulea tatau ma vaaia lelei le siosiomaga o le gataifale;
- ✚ Toe faatupulaia punaoa ma tamaoaiga o le gataifale aua tupulaga i le lumanai.
- ✚ Siitia le silafia o tagatanuu i le taua o le gataifale mo le soifua manuia

5.1 Tapenaga

O lenei tapenaga sa saunia lava e le Fono a Alii ma Faipule ma tagatanuu o SATALO, faatasi ai ma le lagolagosua a le Ofisa o Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia pei ona faamatalaina atu i lalo.

5.1.1 *Feiloaiga Muamua a le Afioga ma le Ofisa o Faigafaiva*

Sa faato'ai mai le finagalo o alii ma faipule o SATALO e ala mai le Tofi Pulenuu sa auai mai i se semina faalauiloa a le Vaega o Faigafaiva. Sa atofaina ai loa le aso Gafua 16 o Mati 2009 e faatinoina ai se fonotaga muamua a le Ofisa ma alii ma faipule o le afioga e faamalamalamaina ma taliaina ai le polokalame. O le polokalame lenei e fesoasoani ai i afioga e fausia se Tusi Taiala e Pulea Tatau ai le Faaaogaina, Faasao ma le Puiipua lelei o Punaoa eseese o le Gataifale. O le maea ai o lenei feiloaiga muamua na taliaina lelei ai e le afioga le polokalame ma faamautuina ai le aso mo faatalatalanoaga ma vaega e tolu o le afioga.



5.1.2 *Faatalatalanoaga ma Vaega o le Afioga*

O le faatinoga o faatalatalanoaga sa vaevaeina ai le afioga i vaega e tolu o matai, aumaga ma tamaitai, ma sa faatautaia e le Ofisa o Faigafaiva mataupu taua i ia talanoaga. O nei faatalatalanoaga na mafai ai ona aoina mai ai manatu ma faamatalaga i faigafaiva, faafitauli o le gataifale aemaise ni föfö e foia ai. E le gata i lea, o matafaioi a le afioga i le faatinoina o galuega faapea matafaioi a le Ofisa o Faigafaiva e fesoasoani ai i le atinae Faasao o le Gataifale a le afioga. E tele ma tamaoaiga finagalo ma manatu sa aoina mai vaega eseese ona o le toatele oi latou sa auai e lagolagoina le faatinoina o nei faatalatalanoaga. O le aso 23 o Mati 2009 sa faatinoina ai nei feiloaiga ma vaega e tolu o le afioga a.



5.1.3 *Komiti Faufautua o le Faasao*

O le fonotaga a le Komiti Faufautua o le Faasao a le afioaga i le aso 6 Aperila 2009 sa iloiloina ai le ata o lenei Tusi Taiala. O lenei Komiti Faufautua sa filifilia ai sui e ta'i tolu mai i vaega o matai, tina ma aumaga. O le matafaioi a le Komiti Faufautua o le tuufaatasia lea o faamaumauga ma faamatalaga sa aoina mai i faatalatalanoaga e pei ona ta'ua i luga.

5.1.4 *Pasiaina o le Tusi Taiala i le Fono Mulimuli*

O le fonotaga mulimuli i le aso 15 Aperila 2009 na tuuina aloaia ai lenei Tusi Taiala i le Fono a alii ma faipule e sui o le Komiti Faufautua ma le Ofisa o Faigafaiva mo le faamautuina ma le pasiaina.

O lenei foi fono na faailoa ai sui filifilia o le 'Komiti o le Faasao' e taita'ia le faagaioiga o fuafuaga ua uma ona fa'ata'atitia. O le faagasologa atoa o nei fuafuaga fa'ataatitia e aofia ai vaega e faatautaia e le afioaga faapea fuafuaga e faatautaia e le Ofisa o Faigafaiva e lagolagosua ai i le Faasao o le Gataifale a le afioaga.

6 FUAFUAGA FAATAATITIA ma TULAFONO

O fuafuaga faataatitia o ni gaiioiga ua faamoemoe e tatau ona foia ai faafitauli ua faaalua ma faailoa mai e vaega eseese o le afioaga. E lua vaega o fuafuaga faataatitia ua fuafuaina:-

- Fuafuaga faataatitia ua faaāgaāga e faatino e le afioaga o SATALO;
- Fuafuaga faataatitia mo le Ofisa o Faigafaiva lea e patino lava i le tuuina atu o fautuaga mo le FAASAO O LE GATAIFALE a le afioaga.

O fuafuaga faataatitia a le afioaga e pito sili ona taua aua e faaalagolago i le pulega mamalu a alii ma faipule le maopoopoga o le faatinoga. Ae o galuega uma lava e faatinoina e le Ofisa o Faigafaiva e ao ona faamaonia e le Ofisa Sili Lagolago (Assitant Chief Executive Officer) a le Matagaluega o Faatoaga ma Faigafaiva.

O nisi o tulafono o ta'ua i lalo a le afioaga e faamamafa ai Tulafono Autu a le Malo e puipuia, faaoga ma pulea tatau ai punaoa ma alamanuia o le gataifale.

6.1 Ia Faamalosia Tulafono Faale-nuu e Faasaina ai Faigafaiva le Talafeagai

Otootoga

O nisi o faigafaiva ua mautinoa e ogaoga o latou aafiaga i le faatamaiaina o le fogatai ma le tele o meaola o le gataifale. O se faataitaiga o nei ituaiga faigafaiva le talafeagai e iai le faaogaina o vaillau o'ona, ava niukini, fanai'a faapea tu'iga poo faamo'a. Ua le gata ina faatamaia ai se vaega tele o le fogatai ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia i nei ituaiga o faigafaiva.

Fuafuaga Faataatitia a le Afioaga

Ua faailoa mai e le Komiti Faufautua a le afioaga le toe faamalosia o puipuga a le afioaga e faamamalu ai tulafono ua faataatitia. Ma sa faatalanoaina i le fonotaga a le Komiti o le Faasao i le

aso 6 Aperila 2009 le toe faamalosia ma unaia e le Komiti o le toe faasalalauina o tulafono ina ia malu puipuia ai tulaga o le atinae aemaise o le ogasami faasao.

6.1.1 Tulafono

Mo tagatanuu o SATALO faapea tagata mai isi afioaga:-

“Ua matua faasaina lava faigafaiva le talafeagai e pei o fanai’a, ava niukini ma vailaau oona.i gataifale o SATALO.”

O le puipuiga ma le faamamaluina o lenei tulafono o le a i aao o alii ma faipule ma le lagolagosua a le afioaga.

6.1.2 Faasalaga

Mo soo se tagata o le afioaga e maua ua ia solia lea tulafono, o le a noatia i se sala tupe e \$500.00 Mo tagata mai isi afioaga, o le a molia sao i le *Tulafono Laiti a le Afioaga* poo le *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia i lalo o lenei polokalame o Faasao o le Gataifale. E le gata i lea ae o le tuina atu o faamatalaga ma fautuaga mo le faamautuina o fuafuaga, atoa ai ma le faasalalauina o nei tulafono a le afioaga.

6.2 Ia Faasalalauina Tulafono a le Afioaga

Otootoga

Na fautuaina e le Komiti le faasalalauina o tulafono a le afioaga ua faataatitia mo le faamoemoe ia puipuia le siosiomaga o le gataifale ma ona tamaoaiga faapea faigafaiva. Sa talanoaina foi e le Komiti, e ao ona toe faasalalauina tulafono Autu o Faigafaiva faatasi ai ma isi tulafono pei ona pasia i lenei Taiala aua le silafia e tagata lautele e tusa o aiāiga uma o nei tulafono.

Fautuaga ma le Faamoemoe

Ina ia silafia ai e le atunuu aemaise ai o afioaga tuaoi nei tulafono, ma ia faapea foi ona nofouta i ai e tusa o faasalaga ua aiāia e alii ma faipule o SATALO.

Autu o le Faasalalaga: *“Puipuiga o le Gataifale o SATALO”*.

Fautuaga a le Komiti

O le faasalalauina o tulafono o lenei Tusi Taiala o le a faatinoina lea e Alii ma Faipule o le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva i le tapenaina o Tulafono Laiti a le afioaga mo le pasiaina ma faasalalauina mo le silafia e le atunuu. O le a tufaina atu foi kopi o nei tulafono i afioaga tuaoi mo le silafia lautele.

6.3 Faasaina Upega ma Tili Matanini'i

Otootoga

Sa toe faamautuina mai e le Komiti Faufautua o le Gataifale le alagatatau ona usitaia pea o le Tulafono a le Malo. Na ioeina ai e le Komiti le lagolagoina o le Tulafono Faatonutonu mo Faigafaiva 1995 ua pasiaina. O lenei tulafono o lo o aofia ai matāupega mo upega ma tili faapea pa i'a e faatagaina i fagotaga.

Fautuaga

Sa fautuaina e le Komiti le Ofisa o Faigafaiva ina ia taofia le faatauina mai e le Faleoloa o Faatoaga o upega mata nini'i, ae peitai sa faaalua e le Ofisa o Faigafaiva e le mafai ona faia lea tulaga i le taimi nei ona o nei upega o lo o faaaogaina i isi galuega e pei o togalaau aina atoa ai ma isi atinae e puipui mai ai i iniseti faalafua.

Sa faaalua e le Ofisa o Faigafaiva o loo iai tulafono a le Malo ua maea ona pasiaina e faatatau i le faaaogaina o nei upega mo fagotaga ma ua faamalosi nei foi e le Malo faasalaga mo soo se tasi e solia lenei tulafono.

O lea ua finagalo ai le Fono ina ia avea tulafono a le Malo o lo o iai nei e fai ma tulafono a le afio'aga e uiga i upega ma tili matanini'i.

6.3.1 Tulafono

Mo tagatanuu o SATALO faapea tagata ese mai isi afioaga:-

“Ua matua faasaina lava ona toe faaaogaina matāupega e i lalo ifo o le 2 inisi pe 50mm (fua pe a sūsū le upega), i gataifale o SATALO.”

“Ua matua faasaina foi ona toe faaaogaina upega tolotolu ma tili e i lalo ifo o le 1.2 inisi pe 30mm (fua pe a sūsū le tili) i gataifale o le afioaga.”

O le puipuiga ma le faamamaluina o lenei tulafono o le a i aao o le pule a alii ma faipule ma le afioaga.

6.3.2 Faasalaga

Mo soo se tagata o SATALO e maua ua ia solia le tulafono, o le a noatia i se sala tupe e \$500.00, ae mo tagata mai isi afioaga, o le a molia sao i *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva





O le a fesoasoani le Ofisa o Faigafaiva i le tapenaina o Tulafono Laiti a le afioaga ma tuuina atu pepa o faamatalaga o ituaiga i'a ma figota o loo aafia i le Tulafono Autu o Faigafaiva

6.4 Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami

Otootoga

O se tasi lenei o vaega o loo aofia i tulafono ua maea ona faasalalauina ma ua ioeina e le Komiti ina ia aafia ai ma le puipuiga o le togatogo ona ua avea foi ma nofoaga e o faatafunaga o lapisi.

O le lafoai o otaota i le sami, matafaga ma togatogo o le a:

-  avea ma mafuaaga ma nofoaga e tautuufua ai namu, mogamoga ma isi inseti faalafuā;
-  faamanu'alia pe lavevea ai tagata lautele i atigi apa ma atigi fagu, aemaise le avea ma puna'aga o faama'i;
-  avea ma nofoaga e le talafeagai mo meaola o le sami;
-  atagia ai le le faatauaina e le afio'aga o le gataifale ma le tele o ona alamanuia ma nisi o ona tamaoaiga.

Fuafuaga Faataatitia a le Afioaga

O le faamoemoe o le afioaga ia foia nei faafitauli ma ia fausiaina pe iai se nofoaga e lafoai uma iai otaota a le afioaga atoa. Faataitaiga, e mafai ona lafoai otaota i se lua ma ufiufi malu aua le saogalemu mai faama'i ma siama feavea'i. Talu ai e mafai ona tafe ma ulu atu le oona o lapisi poo vaila'au o loo lafoaiina i lea lua, o lea e fautuaina ai le afioaga, ina ia eliina se lua i se nofoaga mamao ese mai puna vai taumafa faapea le sami.

O le fautuaga a le Komiti, o le faia ma faamauina lea o se tulafono e taofia ai tagata SATALO ma isi afioaga tua'oi ona toe lafoai ni otaota ma lapisi i le gataifale.

Ua faailoa foi e le Komiti le faia o asiasiga aai tai 2 vaiaso, ma faamalositia foi aiga taitasi e faaoga le taavale lapisi mo le aoina ma le lauina o nei otaota.

6.4.1 Tulafono

Mo taganuu o SATALO faapea tagata ese mai isi afioaga:-

“Ua matua faasaina lava ona toe lafoai otaota ma lapisi e pei o atigi apa, atigi fagu, uamea, pepa iila ma isi ituaiga i le matafaga ma le talafatai o SATALO.”

O le puipuiga ma le faamamaluina o lenei tulafono o le a i aao o alii ma faipule

6.4.2 Faasalaga

O soo se tasi e solia lenei tulafono o le a faasalaina i le \$200.00 a le aiga. A le usita'ia loa lenei faasalaga, o le a tuuina atu i le pule a alii ma faipule pe molia loa i Tulafono Laiti a le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva e toe faamautuina Tulafono Laiti, tuuina atu pepa o faamatalaga mo le silafia lautele o le afioaga.

6.5 Ia Aoina ma Faatama'ia Alamea

Otootoga

O le alamea o se meaola o le ituaiga o le aveau, ma e nofo pe maua i luga o a'au ma amu i le sami. O le alamea na te aina pe ola i meaola ninii ua ta'ua o polipe o loo fausiaina ai amu. A oo ina faateleina lenei meaola o le alamea, o le a faapena ona latou tapēina ma faatamaia a'au ma amu o lo o pipii ma ola ai. O le popolega o le afioaga, o le a i se tulaga pagatia le tele o meaola i le aloalo o loo faalagolago i le a'au ma amu mo meaai ma nofoaga e ola ai. E le mafai ona faaumatia pe tapēina lenei meaola i le sami. Aua foi, e mafai e le alamea ona toe ola pe tatupu ona itutino pe ola mai ai isi alamea fou seia vagana lava ua aumaia i le pa'umatū ma faamamagoina ai i le la, pe susunuina foi.

E pei ona faailoa mai e aumaga ma le au tautai, o le alamea o se tasi lea o faaaitaui mo faigafaiva o loo iai nei i gataifale o SATALO.

Fuafuaga Faataatitia a le afoaga

la aoina ma faaputuina e le afoaga alamea pe a latou va'aia pe tau foi iai i taimi o fagotaga. la aumaia i uta nei meaola ma tanumia pe faamagoina ai. Sa fautuaina foi ma faaali finagalo o alii ma faipule o SATALO, o le a taumafai le aumaga atoa ma le au tautai e latou te aoina mai le alamea ma faatamaia i uta.

Taimi Fautuaina

la faaauau le aoina o lenei meaola faalafuā i taimi uma ma aso uma. O lenei taumafaiga, o se auala e puipuia ai amu, siosiomaga ma le tamaoaiga o le gataifale.

Fuafuaga Faataatitia a le Ofisa o Faigafaiva

O le faamalamalamaina o ni fesili e faatatau i lenei fuafuaga i le aoina o le alamea, sa faapupulaina ai i le afoaga e leai se polokalame a le Malo e totogi ai le aoina ma le faatamaia o le alamea. Ae e fesoasoani pea le Ofisa o Faigafaiva e tuuina atu faamatalaga ma fautuaga mo auala e tineia ai le alamea mai gataifale o SATALO.

6.6 la Faasaina tu'iga ma faamo'a

Otootoga

O tu'iga ma famo'a ua maitauina e le afoaga le matua faaleagaina ai o le gataifale. O ituaiga faiva nei e faigofie ona maua ai i'a ma figota; peitai e ogaoga ma matautia ona aafiaga. E ui ina seāseā ona toe faatinoina peitai ua manatu lava le Komiti Faufautua le tatau lava ona tuuina i lenei Taiala

Fuafuaga Faataatitia a le Afoaga

Sa faaalai i le Fono le tatau ona faia o se tulafono e faasa ai lenei ituaiga faigafaiva matautia e pei ona faatinoina i aso ua mavae. Ua iai foi le mau o tuiga o amu i le faiva o le fao-tuitui ua tele ina nuti ma faaaleagaina ai amu, ma ua faasaina foi lenei faiva i gataifale o le afoaga.

6.6.1 Tulafono

Mo tagatanuu o SATALO faapea faifaiva mai isi afoaga:-

“Ua matua faasaina lava ona toe faatinoina faigafaiva e pei o tu'iga ma faamo'a i gataifale o le nuu. Ua faasaina foi ona toe faia le faiva o le fao-tuitui i le gataifale o le afoaga”.

6.6.2 Faasalaga

Soo se tasi lava e faia lenei ituaiga faiva i gataifale o SATALO, o le a noatia i se sala tupe e \$500.00. O le tuiga o amu i le faiva o le fao-tuitui e faasalaina i le \$300.00. Mo tagata mai isi afoaga o le a molia i le Tulafono laiti a le afoaga e tauala atu i le Vaega o Faigafaiva.

Fuafuaga a le Ofisa o Faigafaiva

O le a fesoasoani le Ofisa o Faigafaiva mo le faatinoina o Tulafono laiti a le afoaga ma tufaina atu fuafuaga faataatitia a le afoaga e ala atu i le Polokalame o Faasao.

6.7 Ia Faasaina le Fagotaina o I'a ma Figota Laiti

Otootoga

O leni fuafuaga tatau e taua mo i'a ma figota laiti ia latou maua ai se avanoa e fanafanau ai ae le'i fagotaina mai e le aufaifaiva. Aua afai ae fagotaina mai i'a ma figota laiti ae le'i o'o i le lapopoa/matutua e fananau ai o lona uiga ua le mafai ona fanafanau mai ai nisi i'a ma figota o le sami ina ia faatupulaia ai ia punaoa. Afai o le a faaauuina pea lea tulaga, o le a saga faaitiitia ai le faitau aofai o i'a ma figota o le sami.

Fuafuaga faataatitia a le Afioga

Ua faaalila le lagolagoina e le Komiti Faufautua a le afioga o Tulafono Faatonutonu o Faigafaiva ua pasiaina o lo o aiāiā ai fua faatapula'a mo le laiti o i'a ma figota e tatau ona fagotaina mai.

6.7.1 Tulafono

Mo tagatanuu o SATALO faapea ai faifaiva mai isi afioga:-

“Ua faasaina ona toe fagotaina i'a ma figota laiti mai le gataifale o SATALO, e pei ona faaalila i le Tulafono Faatonutonu o Faigafaiva a le Malo”.

O le puipuiga ma le faamamaluina o leni tulafono o le a i aao o alii ma faipule ma le afioga o SATALO faapea le lagolagosua a le Vaega o Faigafaiva.

6.7.2 Faasalaga

Mo soo se tagata o SATALO e maua ua ia solia lea tulafono, o le a noatia i se sala tupe e \$500.00, ae mo tagata mai isi afioga, o le a molia sao i *Tulafono Faatonutonu o Faigafaiva, 1995*.

Fuafuaga Faataatitia a le Ofisa o Faigafaiva

O auunaga a le Vaega o Faigafaiva i lalo o le Polokalame Faasao e aofia ai le tuina atu o Pepa o Faamatalaga o loo iai i'a ma figota o loo aafia i leni Tulafono. Ia faatinoina foi ni aoaoga mo le afioga i aiaiga uma ma le sao o tagata nuu i le faamalosia o leni tulafono.


6.8 Faasao o le Gataifale o SATALO

Otootoga

O se vaega o le gataifale ua faasaoina, e tatau ona le toe faatinoina ai ni faigafaiva. O le avea o lea vaega o le gataifale ma ogasami faasao e tatau ona malu puipuia lona siosiomaga. O autu taua o leni ogasami faasao, e faasaoina ai amu ma a'au faapea i'a ma figota ina ia mafai ona maua e nei meaola se nofoaga malu e ola, tautuufua ma fanafanau ai ma tafea atu o latou fuafanau ma faatupuina ai meaola o le sami.

Fuafuaga Faataatitia a le Afioga

Ua faamautuina mai e le Komiti Faufautua le tatau ona galulue faatasi ma le Vaega o Faigafaiva i le:

 faatinoina o se suesuega i le vaega ua faailogaina e le afioga e avea ma Faasao o le Gataifale;

- ☞ saunia ma faamalamalamaina le lipoti o ni faaiuga o lenei suesuega;
- ☞ tuuina mai o fautuaga talafeagai mo le taulau manuia o le Faasao
- ☞ faasalalauina tulafono o le Faasao
- ☞ a'oa'oina sui o le afioaga i metotia ma auala e vaaia lelei ma mataitūina ai le ola o amu, i'a ma isi alamanuia o le Faasao

6.8.1 Tulafono

Mo tagatanuu o SATALO faapea ai faifaiva mai isi afioaga:-

“Ua matua faasaina lava soo se tagata o SATALO faapea nisi faigafaiva mai isi afioaga ona toe faia soo se isi lava ituaiga o fagotaga i le vaega o le aloalo ua faasoina ma faallogaina”

6.8.2 Faasalaga

Mo soo se tagata o SATALO e maua ua ia solia lenei tulafono, o le a noatia i se sala tupe e \$500.00 ae mo tagata mai isi afioaga, o le a molia i *Tulafono Laiti* a lenei afioaga.

O le puipuiga ma le faamamaluina o lenei tulafono o le a i aao o alii ma faipule ma le afioaga o SATALO.

Fuafuaga Faataatitia a le Ofisa o Faigafaiva

E ao i le Ofisa o Faigafaiva ona:

- ☞ faatinoina manaoga talafeagai ua tuuina mai e le afioaga;
- ☞ tuuina aloaia atu i le Komiti o le Faasao se lipoti o suesuega ma ni fautuaga talafeagai mo le silafia e le afioaga
- ☞ tuuina atu ni fautuaga ma ni faamatalaga mo le tausiga, pulea tatau ma le vaaia lelei o le ogasami faasao o le gataifale a le afioaga.

6.9 la taofia ma faasaina le eliina ma laueseina o oneone mai le gataifale

Otootoga

O le faatelēina o apitagalu ma matafaga mai le fetafeaiga o au ma galu malolosi ona o fesuaiga o le tau, ua faapogai mai lea ina ua tele se vaega o oneone o le matafaga poo apitagalu ua toesea pe asuina. Ua avea foi le asuina o le oneone ma mafua'aga ua faaititia ai ona toe ofaga le tele o meaola e pei o fugafuga, mama'o ma isi o loo aumau i nei vaega o le gataifale. O le tele o le palapala tafia ma le pefu o le a tafe atu ma ufitia ai amu ola ma filogia ai le suasami ona ua eliina maualalo le oneone ma faaleagaina ai vaega e tautuufua ai i'a ma meaola e pei o laumei. O le eliina foi o le oneone i vaega lalata i togatogo, punavai ma vaitafe e matua ogaoga lava se aafiaga o le siosiomaga o le gataifale e ono tulai mai.

Fuafuaga a le afioaga

Ua manatu le Komiti faufautua e fautuaina le fonu a alii ma faipule e toe faamalositia le tulafono e taofia ai le toe eliina pe lauese ai foi le oneone mai le gataifale o le nuu. Ua faaalii foi lo latou lagolagoina o tulafono a le Malo faapea aiaiga talafeagai mo le puipuiga o le gataifale. O tagata lava o le afioaga e manaomia le oneone mo galuega e soalaupule lava e le Komiti, ao le au faipisinisi e matua faasaina lava.

6.9.1 Tulafono

“Ua matua faasaina soo se tagata, kamupani faipisinisi ona eliina pe lauina le oneone poo ni maa mai le gataifale i faiga faasolitulafono mai le talafatai o SATALO.”

6.9.2 Faasalaga

O le a noatia i se sala tupe e \$2000.00 soo se tasi e le usitai lenei tulafono poo le molia foi i Tulafono Laiti a le afioaga.

Fuafuaga a le Vaega o Faigafaiva

Tuuina atu fautuaga e ala i polokalame faaaoaoga ma pepa o faamatalaga. E saunia foi le faia o Tualafono Laiti e lagolago ai manaoga o le afioaga.

6.10 Faigafaiva e faaaogaina ai Faguea ma mea manava

Otootoga

O le faaaogaina o moli uila ma faguea i faigafaiva, ua molimauina ai le tele o i'a ma figota e mafai ona fagotaina mai ai. Ua iai le popolega o le a oo atu i se tulaga faaletonu i'a ma figota ona o le faigofie o lenei faiva, ma tele naunau punaoa e aveeseina mai se taimi puupuu lava. O le faaaauina o faiva i faguea ma moliuila ua tele ina sesegi ai i'a lapopoa ma mamao atu mai le aloalo e masani ona aumau ai.

Fuafuaga Faataatitia a le Afioaga

Ua faaalua e le Fono le faasaina o faigafaiva e iai lama moli uila ma faguea e masani ona fagogota i tua-aau o le afioaga. O nei tagata latou te faaaogaina se alia fagota ma latou soona fagotaina tamaoaiga e pei o ume, laea, filoa, galo ma malauli lapopoa o loo manuia ai le gataifale o SATALO

6.10.1 Tulafono

Mo le aufaifaiva e faaaogaina faguea:-

“Ua matua faasaina lava ona toe fagotaina gataifale o SATALO e faaaogaina ai faguea ma mea manava”.

6.10.2 Faasalaga

Soo se tagata e maua ua ia solia lenei tulafono, o le a noatia i se sala tupe e \$1000.00 poo le molia i le Tulafono laiti a le afioaga

O le puipuiga ma le faamamaluina o lenei tulafono o le a i aao o alii ma faipule ma le afioaga o SATALO

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o Tulafono Laiti a le afioaga e ala atu i le Polokalame Faasao faapea le tuuina atu o faamalamalamaina o le taua o Togatogo i le siosiomaga o le tagata soifua faapea le gataifale

6.11 Faasaina faigafaiva mai isi Afioaga

Otootoga

Ua maitauina e le afioaga o SATALO le faatupulaia pea o tagata fagogota mai isi afioaga ua fagotaina punaoa eseese o le aloalo. O le tele o nei faigafaiva ua faaogaina metotia le talafeagai ma soona fagotaina foi ma le le fuafua tatau nisi o tamaoiga e pei o sea, ape, mama'o, loli faapea foi i'a eseese.

Fuafuaga Faataatitia a le afioaga

Sa iloiloina ma le toto'a e le Komiti lenei faafitauli ma toe teuteu ai loa le tulafono e pei ona faailoa atu i lalo. O le a fautuaina foi le Fono a alii ma faipule i lenei fuafuaga.

6.11.1 Tulafono

“Ua matua faasaina lava soo se tagata ma nisi afioaga ona faatinoina fagotaga le talafeagai ua faamauina i totonu o lenei Taiala”.

6.11.2 Faasalaga

“O le a molia i le Tulafono Laiti a le afioaga soo se tagata e solia lenei tulafono”.

Fuafuaga Faataatitia a le Ofisa o Faigafaiva

O le a matua lagolagoina e le Vaega o Faigafaiva lenei fuafuaga a le afioaga ma o le a faatinoina foi le Tulafono Laiti e pei ona fautuaina.

7 ILOILOGA O LE TAIALA

Ua iai se maliliega i le FONO ma le Komiti o le Gataifale a SATALO faapea le VAEGA O FAIGAFAlVA o le a faaauau pea ona toe iloiloina le taulau manuia o lenei Taiala pe a mavae le ono (6) masina. O lenei iloiloga o le a iloa ma mautinoa ai le alualu lelei poo ni faaletonu fo'i e feagai ma le faatinoina o galuega o lenei Taiala. O le a mafai foi ona faia ni fautuaga mo le lelei atili ma soalaupule foi ni faafitauli e ono tulai mai. O lenei foi iloiloga o le a iloa ai le tulaga lelei poo le maualuga ua ausia e le afioaga talu ona faatinop galuega o loo aiaia i lelei Taiala.

8 UPU MULIMULI

O le toe auai mai o le afioaga o SATALO i le POLOKALAME MO LE PULEA TATAU O TAMAOAIGA O LE GATAIFALE o se tofā ma se faautuga loloto, poo se faamoemoe ua matua sili ona talafeagai, ma ua mautinoa le manuia o le afio'aga i ni tausaga o i luma pe afai ae tumau ona faaauauina pea. O le manuia ma le alualu i luma o lenei polokalame e faalagolago tele i le galulue faatasi o le afioaga, i le pule mamalu a alii ma faipule, komiti a tina ma tamaitai, aumaga aemaise o le Malo e tau ala atu i le Ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faaatali ai lona taulau manuia ae peitai ua mautinoa o le toe faaleleia ai lea o alamanuia o le gataifale e faalagolago iai le afioaga. O i latou o le a talisapaia ma 'ae'ae i nei manuia, o tagatanuu lava o le afioaga faapea tupulaga i le lumanai. O lea ua a'e ai se tofa i le afio'aga e galulue faatasi i lenei polokalame a le Malo ma Afioaga e fesoasoani ai e toe tapu'e mai le tamaoaiga o le gataifale ua tauau ina mou atu.

10 SUI AUAI I FONOTAGA SA TAPENAINA LENEI FUAFUAGA TATAU

O loo faailoa foi i lenei TAIALA suafa o'i latou sa auai i le tapenaina o lenei Fuafuaga Tatau. O sui mamalu foi ia o le Afioaga sa soalaupuleina ma tofu sao i faatalatalanoaga o faafitauli faapea le saunia o tulafono. E le itiiti lo outou sao ua faaalai i totonu o lenei Taiala aua o se mea totino lava a le afioaga o SATALO

VAEGA o MATAI

1	Taloolemaagao Olano (Pulenuu)	12	Soi Mati
2	Faatuuala Puapua	13	Tafaoimalo Tausili
3	Faatuuala Faaaoga	14	Tafaoimalo Misipati
4	Faatuuala Faolataga	15	Tafilelea Tasi
5	Fao Tafafao	16	Taloolemaagao Faafoa
6	Fao Gose	17	Taveuveu Faletasi
7	Fonoti Taeaoalii	18	Taveuveu Filisoa
8	Leaoa Vili	19	Taveuveu Tafa'i
9	Naisoa Faitoatasi	20	Taveuveu Tuluu
10	Saolele Le'au	21	Vaeila Su'esu'e
11	Satele Faamu		

VAEGA o TINA & TAMAITAI

1	Aloalo Taloolemaagao	5	Faapopo Leaupepe
2	Alatise Naisoa	6	Fuamai. Lolo Manu'a
3	Eseta Silalovi	7	Lesina Tafaomalo Misipati
4	Faamalepe Taveuveu		

VAEGA o TAULELE'A/AUMAGA

1	Esela Taveuveu	8	Natia Vili
2	Etuale	9	Peni Taloolemaagao
3	Iata Liu	10	Pulou Tafi
4	Fale Malaga	11	Saunoa
5	Fereti Matai'a	12	Sene Silafaga
6	Mai Fomai	13	Suaia
7	Manua	14	Keti Afoa

11. KOMITI O LE FAASAO O LE GATAIFALE A LE AFIOAGA

Matai		Aumaga		Tamaitai	
1	Taloolemaagao Olano (pulenuu)	1	Esera Taveuveu	1	Aloalo Taloolemaagao
2	Taloolemaagao Afoa	2	Fereti Mataia	2	Faamalepe Taveuveu
3	Fao Tafafao	3	Peni Taloolemaagao	3	Faapopo Leaupepe
4	Faatuala Faaoga	4	Pulou Tafi	4	Fuamai Lolo
5	Tafaomalo Tausili	5	Sega Silafaga		
6	Soi Mati				
7	Taveuveu Tautuliu				
8	Vaeila Suesue				

